

Powšitkowne WOZJEWJENJA

njedźelu, 5. januara 2014

Hodowny koncert w Chróścicach

Tradicionalny hodowny koncert Chróścanskeho cyrkwinskeho chóra z instrumentalistami a solistami wotměje so tutu njedźelu, 5. januara, w 14 hodź. w tamnišej wosadneje cyrkwi. Wšitcy zajimcy su wutrobnje přeprošeni.

Zhromadny dzeń za holcy 3. a 4. lětnika

Dekanatne dušepastyrstwo přeprošuje wšitke holcy 3. a 4. lětnika sobotu, 18. januara, wot 9.00 do 15.00 hodź. do Don Boskoweho domu we Worklecach. Zajimče njech so prošu hač do wutory, 14. januara, pod telefonowym čisłom (03 57 96) 8 87 07 přizjewja. Za wudawki dnja zběra so wot kóždeje wobdźělnicy přinošk we wysokosci třoch eurow.

Dalekubłanje za wosadne rady a člonow TCM

Wšitcy člonjo wosadnych radow w Budyskim dekanacie a Towarstwa Cyrila a Metoda z.t. (TCM) su njedźelu, 19. januara, na dalekubłanje k temje „Wěru wobswědčeć w džensnišim swěće“ přeprošeni. Wone budže wot 8 do 10.20 hodź. na Chróścanskej farje. Přednošk změje rektor Smochčanskeho Domu biskopa Bena, dr. Peter-Paul Straube. Tež dalši zajimowani su wutrobnje na tute zarjadowanje witani. Wobdźělnicy móža w 7 hodź. (serbsce) abo w 10.30 hodź. (němsce) njedźelnu Božu mšu w Chróścanskej cyrkwi wopytać.

Pěši do Częstochowy

Tež lětsa pozbudža farar Beno Jakubaš, so w serbskej skupinje na putnikowanje z Warszawy do Częstochowy podać. Hić smě kóždy sobu, kotryž je 18. žiwjenske lěto docpěł. Termin putnikowanja je wot 5. do 15. awgusta. Zajimcy njech so bórže přizjewja pola fararja Bena Jakubaša w Njebjelčicach, telefonowe čisło (0 35 78) 30 20 05.

Putniskej jězbje do Słowjenskeje a Chorwatskeje kaž tež do Swjateho kraja

Lětuša přenja putniska jězba powjedže nas wot wutory, 3. junija, hač do wutory, 10. junija, do Słowjenskeje a Chorwatskeje. We wobłuku našeje kołoježby z busom chcemy putniske městno Brezje w Słowjenskej wopytać. Dalše cile su narodnej parkaj „Plitwicke jězory“ a „Krka“, Makerska riviera kaž tež město Dubrovnik. Dalša putniska jězba budže wot pónđzele, 15. septembra, hač do pónđzele, 22. septembra. Planowane je, zo podamy so z lětađlom do Swjateho kraja. Nadrobne informacije k woběmaj jězbomaj dóstanu zajimcy pod telefonowym čisłom (01 63) 7 33 82 05.

Maćij Hadank

